

Juan Quimsa Cartacuśhan

Cay cartachüpis Juanmi “yaśhawan” camalachicun. Diotrefes śhutiya nuna Juanpa yačhachicuyninpa cuntran śhalcuptinmi cay cartacta apachin chalapacücunäta michiycünin Gayoman. Cayčhümi niycun chay lulaynin-čhu jinalla tacyaycul allincäta atiycachinanpä. Ñatac allincäta luläcá Tayta Diospam. Mana allinta luläcãñatacmi ichá Tayta Diosta mana lisincho.

¹Ya’a yaśham sumä cuyaśhá am Gayoman isquirbiycamuc.

²Cuyaśhá Gayo, imačhüpis allin-ari caycuy, chalapacuyniquičhu sumä allin caśhayquinütac aychayquipis, allin sänulla caycuchun.

³Maynu rasuncämannyu cawsaśhayquita cayman śhamü chalapacü-masinchiccuna willaycapämaptinmi sumä-sumäta cushicülú.

⁴Cay chulicuna rasuncämannyu sumä cawsaycälishanta uyalishäpi cushicuśhänü’a manamá imapis cancho.

⁵Aw-ari, cuyaśhá, maynu sumä allintam sirbiycunqui chalapacü-masinchiccunacta licaycuyniquiwan masqui mana lisiyalcalpis. ⁶Paycunamari sumä allinpa licaycälishayquita cayčhu cä chalapacü-masinchiccunačhu willaculcan. Chayurá biäjicta pasapacunanpä imallačhüpis yanapaycuśhayquiwan Tayta Diosninchicpa śhun’unpänümá lulaycunqui. ⁷Paycuna mana chalapacücunäpi ima yanapaycuylactapis mana mañapaculmi allin willacuyta willaculcä yalälälila. ⁸Chaymari ya’anchiccuna yanapaycunanchic rasuncäta willacuyčhu lulä-masin cananchicpä.

⁹Ñatac chayčhu cä chalapacü-masinchiccunapä cartacta isquirbimulãnam. Jinaptipis Diotrefes’a payllaña mandätucünin cayta munayninwanmi ya’acunapi nĩ uchucllapis yačhayta munancho. ¹⁰Chaymi śhamul lluy lulaśhanta camalaycachishä. Ya’acunap waśhacunacta limaśhtinmi yan’al pulin. Chaywanpis mana mačhayculmi watucü śhamü chalapacü-masinchiccunactapis mana čhasquiycunpischo. Čhasquiy munäcunätapis alapacunlämi canpis.

¹¹Chayurá cuyaśhá Gayo, chay mana allin lulaycunäta ama-ari atichiycho, aśhwanpa allincällactari. Cay allincäta luläcá Tayta Diospam. Mana allincäta luläcämi ichá Tayta Diosta nĩ lisincho.

¹²Demetriopitañatacmi ichá lluytis allinta limapacun. Rasuncäpis cawsayninwan tincuycunmä.^a Yačhašhayquinüpis ya'acuna cäcällacta limacü calmi ya'acunapis paypita allinta limapacü.

¹³Ñatac may-chica nipacunac cayaptinpis, manamá cay cartachu lluy niyta munächu. ¹⁴Ašhwanpam anwan tincuycuyta munayá cära-cära sumäta limaycunäpä.

¹⁵Jawca cawsayca améchu caycuchun. Cayéchu cä lisanacu-šhanchiccunäpis limaycälimušhunquim. Chaynütac chayéchu lisanacušhanchiccunätapis manyallapi limaycuy. Jamallá.

^a **12** *Rasuncäpis ... tincuycunmä* Griego limayéchu'a "rasuncäpis paypita allintam liman" nin.